

西湖志

陳衍署檢

73115

地727.31

43.91

部三:7



西湖志卷十三

人物一

西湖蘊精孕靈挺生賢哲地脈既通名流益集影
纓竦轡因有高軒諮梵譚玄何區外道是故徹堙
導壅固存畚鍤之勞葺宅結廬並著釣遊之跡溯
湖山耆舊歌思遺愛景仰畸蹤謂是觥觥者均宜
尚友云爾志人物

晉

嚴高

清一統志高瑯琊人太康三年為晉安太守

西湖志

卷十三

人物

時初置郡城隘不足容衆遂改築子城又鑿渠通
舟楫濬東西二湖以溉田

唐

王翊

淳熙三山志翊貞元八年自大理卿出為福

建觀察使閩都記貞元十一年翊闢城西南二百

四十步接西湖之水灌於東南今柳橋是也

陳巖

邵武府志陳巖字夢臣建寧人慷慨有智畧

乾符間黃巢轉掠福建諸州巖聚衆數千保鄉里
號九龍軍巢不能為害時邑為黃連鎮巖表為義

甯軍僖宗以巖爲義甯鎮將賜鼓角置牌印中和
四年破黃巢部將於福州福建觀察使鄭鑑表爲
團練副使尋以擊敗李連功表巖自代巖爲治有
威惠先是城壁公府學校爲巢焚蕩幾盡乃悉力
完輯閩中遂安光啟二年王潮據泉州聞巖威名
不敢犯境遣使請降巖以潮能招懷離散均賦愛
民表爲泉州刺史大順二年巖病遣使召潮欲授
以軍政未至而卒王氏據有全閩自此始道光福
建通志巖墓在福州敦業鄉太平里

宋

蔡襄 六一居士集襄字君謨興化軍人也天聖八
年進士慶歷四年以右正言直史館出知福州以
便親遂爲福建路轉運使復古五塘以溉田民以
爲利至和二年以樞密直學士知泉州徙知福州
未幾復知泉州治平二年丁母夫人憂明年八月
某日以疾卒於家年五十有六雍正福建通志襄
守福州日試茗必於龍腰取水手書苔泉二字立
泉側姚循義舊志襄嘉祐初知福州疏導傅城湖

浦大爲民利

曹穎叔

宋史本傳

穎叔字秀之亳州譙人進士及

第歷威勝軍判官改理丞大韓億知亳州辟僉書
節度判官事通判儀州徙夔州路轉運判官夔尙
淫祠人有疾不事醫而專事神穎叔悉禁絕之乃
教以醫提點陝西路刑獄除直史館知鳳翔府徙
益州路轉運使權度支副使皇祐中儂智高寇嶺
南朝議以閩中久弛兵備擢天章閣待制知福州
累遷陝西都轉運使進龍圖閣學士知永興軍卒

西湖志

卷十三

人物

三

於官姚循義舊志皇祐四年穎叔知福州留心水
利修濬湖浦利煩去蠹治行不下古人

樊紀

淳熙三山志

嘉祐三年紀知懷安縣時郡守

蔡襄欲復東湖不可得乃開沿城外河紀復作橋
十三東湖旣湮賴此港浦橋梁導東北諸水以達
於東門

程師孟

雍正福建通志

師孟字公闢吳人熙寧初

以直昭文館知福州先是郡守章岷奏修築子城
以費多役廣不果師孟至謂轉運使曰第得錢二

千萬緡可就矣乃拓舊城西南隅而廣之姚循義
舊志師孟又以餘力濬河隍疏湖浦治橋梁甫半
載而工竣公暇游覽山川多所題咏一時治行爲
東南最

方叔完 閩書叔完莆田人元豐中知候官縣民以
築港澗水害懷安農田二邑交訟叔完往按之曰
不敢私吾邑遂命改築時曾鞏帥郡少所與可獨
信委叔完檄權節度推官且上薦之

陸蘊 陸藻 宋史本傳蘊字敦信侯官人少知名

西湖志

卷十三

人物

四

紹聖四年進士以龍圖閣待制知福州改知建州
弟藻字敦禮由列曹侍郎出知泉州時蘊方知建
州過廨合樂燕款邦人以爲盛事閩都記陸莊園
在高峯橋西宋學士陸蘊與弟藻所營別業今廢
爲平疇

程邁 正德福州府志邁徽州黟縣人建炎四年以
朝散大夫徽猷閣待制知福州時建寇猖獗邁請
師於朝命參政孟庾少師韓世忠討平之州人各
爲立生祠因更名武備堂曰止戈以旌其功自臺

門至虎節門大井有七歲久多湮悉令濬之民獲其利紹興間復以顯謨閣直學士左中奉大夫再知州事

張浚 宋史本傳浚字德遠漢州綿竹人政和二年進士累官太常主簿遷待御史閩書紹興四年提舉洞霄宮居福州九年除資政殿大學士知福州飭守令誠意民事每車騎出入民聚屋登木觀者如堵乾隆福州府志絕學寮在越王山宋丞相張浚讀書處

趙汝愚 宋史本傳汝愚字子直漢王元佐七世孫居饒之餘干擢進士第一召試館職除秘書省正字出知信州易台州改江西轉運判官入爲秘書少監淳熙中以集英殿修撰帥福建爲韓侂胄所中詔永州安置至衡州暴卒侂胄誅盡復原官贈太師諡忠定淳熙三山志西湖舊在州西三里閩王時周回十數里築室其上號水晶宮其後盡爲民田淳熙十年待制趙公汝愚奏請興復朝廷從之

辛棄疾

宋史本傳

棄疾字幼安歷城人紹熙二年

提點福建刑獄尋以集英殿修撰知福州兼安撫

使每歎曰福州前枕大海為賊淵藪上四郡民頑

獷易亂帥臣空竭緩急奈何未期歲積鏹至五十

萬緡牒曰備安庫謂閩中土狹人稠歲儉則糴於

廣今幸連稔宗室及軍人入倉請米出卽糴之候

秋價賤以備安錢糴二萬石則有備無患矣又欲

造萬鎧招強壯補軍額以防盜賊事未行為臺臣

王藺

閩書作簡

所劾逐乞祠歸冠悔堂筆記紹興初辛

西湖志

卷十三

人物

六

幼安知福州常屏從作湖上游不減東坡之於杭

穎也有西湖雨中懷趙丞相並與客泛湖詞均載

稼軒集

趙希澗

道光福建通志

希澗字無垢燕懿王德昭

裔孫居西安嘉定十三年進士淳祐

閩書作景炎誤

十年

以秘閣修撰知福州帶安撫使部內巨猾主民訟

持吏短長者捕其尤治之餘皆掃跡前帥陳塏既

濬內河希澗復濬外河修廣培焉舊戰艦有赤馬

白鷄之屬希澗更造千石舟以備緩急秋大旱希

澗略疏上聞詔航京粟二十萬入閩全活一路有積鏹百萬緡悉儲粟備儉歲平糶遇火災書焚室加惠未數月公私廬舍咸復其舊明年卒於官劉克莊濬河記士民乞濬銚鱸橋支河者言忠定公昔爲西南二湖今南湖半爲芟地蓄洩無所田失灌注公使各寺分濬之計支河六十六丈南湖四十四丈

元

陳有定

道光福建通志有定一名友定字安國福

西湖志

卷十三

人物

七

清人至正間以明谿鎮驛卒起兵據守全閩累官福建行省平章政事洪武元年執送京師不屈被誅閩都記平章池在大夢山元平章陳友定別業

明

王恭

閩書恭濠州人尙太祖公主洪武二年爲福

建行省參政臨行戒之曰福建從昔富庶元末困於弊政腴剝尤甚民病未蘇汝往綏之毋恃親故國家政令一本至公不能守法朕不汝縱恭爲福州築城櫓先造一城于州北跨越王山今名樣樓

唐珣 乾隆福州府志珣字廷貴華亭人天順元年進士成化間出守福州道光福建通志珣爲政以興學勸農爲先初至郡卽新學宮增置登雲書院創迎春亭於東郊以省耕稼便民之事知無不爲任六載去州人乞留不得采民間頌爲八謠贈焉後官至都御史歿後郡人祀之西湖

殷從儉 雍正福建通志儉字汝中廣西臨桂人嘉靖二十三年進士隆慶間以都御史巡撫福建先是倭寇故籍民丁田爲戍餉名曰丁四糧六每

易一撫臣輒增分數卽歲祲必取盈從儉悉復原制及卒有司入檢其篋月俸十數金而已士民奔赴聚哭樵夫牧豎爭獻楮帛櫬出州門縞素設祭道梗不得行民爲建祠西湖以祀

徐中行 閩書中行字子與浙江長興人嘉靖二十九年進士官刑部郎中從李攀龍王世貞爲古文出知汀州歷福建副使進布政參議踰年擢按察使閩都記萬歷五年中行重建澄瀾閣於西湖姚循義舊志會城西湖濱隙地沒於豪右水利湮塞

中行下令濬復捐俸創閣州人德之爲祀於湖上
宗臣 閩書臣字子相揚州興化人嘉靖二十九年
進士授刑部主事太宰李默見臣文奇之召爲其
屬遷員外郎以忤嚴嵩出爲福建參議王世貞宗
公祠記公至適有倭難郭外之民逃賊求入者踵
相接公守西門大帥恐賊乘閒入令勿納公曰奈
何拒吾赤子而委之賊大帥又恐驟益人耗城中
糧更令挾粟者得入否不得入公曰皆民也奚擇
奈何以飢者委之賊遂大開門縱民入諸見阻他
門者亦轉徙而入凡數萬人公度民入且盡徐徐
治守具而數出奇計創賊賊遁走遷本省提學副
使卒郡人爲祠祀之

龐尙鵬

閩書尙鵬字少南廣東南海人嘉靖三十

二年進士以僉都御史督福建軍務初殷從儉撫
閩卒閩人歌且思顧第能減騶從節宴樂而已至
尙鵬孜孜求民利便而張弛之吏民士卒皆得自
達道光福建通志尙鵬所行一條鞭法賦額易知
雖下戶里民皆曉然輸納之數去之日深山窮谷

扶老挾幼遮道哭送及卒閩人爲之罷市與從儉
並祀湖上歲時伏臘尙呼爲龐公福云

商爲正

道光福建通志爲正字尙德浙江會稽人

隆慶五年進士萬歷初以御史按閩行部所至延
問風俗勞來農桑小民日入訴事無所阻因得悉
民間疾苦吏賢姦狀與巡撫龐尙鵬協策行一條
鞭法罷商稅禁鋪行學校橋梁百廢俱舉民有龐
父商母之謠

江鐸

蒼霞文集鐸字士振一字纘石浙江仁和人

西湖志

卷十三

人物

十

閩書鐸世家子有揮斥之才而持廉不濫官終兵
部侍郎姚循義舊志鐸守福州視事年餘邦大協
和乃身自行河登郡城四顧覽觀慨然嘆曰是河
不疏後其陸乎且湖水西渟無復廻抱風氣漓矣
集諸吏民陳說便宜而公獨裁以清衷悉中窾會
不數月而工成閩都記萬歷十四年鐸開北關修
建西湯水部各閘引諸水入河又改西門迎仙橋
舊閘爲壩以蓄湖水

熊尙文

道光福建通志尙文字思誠江西豐城人

萬歷二十三年進士官福建提學僉事姚循義舊志思誠官僉事日禁民佔佃議歸湖之利於學宮而貸學租以完湖稅令民悉反侵地惜行之未久公去而佔復如故矣

陳邦瞻

明史本傳邦瞻字德遠江西高安人萬歷

二十六年進士授南京大理寺評事歷吏部郎中出為浙江參政進福建按察使遷右布政使歷官至兵部左侍郎天啟二年疏陳客氏忤旨譙讓明年卒官詔贈尚書姚循義舊志邦瞻一字匡左官福建按察使議以湖歸官以湖利歸民而蠲本司公費以完湖糧惜其工未竟

西湖志

卷十三

人物

十一

李思誠

道光福建通志思誠字子實勾容人

姚循舊義

志作揚州興化

萬歷二十六年進士官福建按察副使姚

循義舊志思誠官副使日捐俸建閘盡豁湖糧俾

澤梁無禁民甚便之

屠本峻

道光福建通志本峻字田叔浙江鄞縣人

萬歷間以任子官福建轉運同知居三年擢守辰州妙吉祥館筆記本峻官福州與徐燧陳薦夫徐

煥曹學佺結社湖上文酒之譙殆無虛日

章自炳 道光福建通志自炳字汝明浙江蘭谿人

天啟五年進士崇禎間官福建左參議遷副使承
劉香老殘後四民廢業自炳與民休息廖監激變
人情洶洶立解散之分首從定罪境賴以安宗相
集西湖湯斜新港關於會城風氣積十餘年相伏
莫敢發諸孝廉以告公立爲開濬符下海防丞視
湖蓋朝報命而夕擴清矣

清

西湖志

卷十三

人物

十二

周亮工 淇園未定稿亮工字元亮別號樸園河南

祥符人明崇禎十三年進士以守濰有功授浙江
道監察御史京師破順治二年詔以御史招撫兩
淮累遷至福建按察使踰年升右布政尋轉左擢
左副都御史雍正福建通志十三年以罪誤赴閩
聽質適海賊甘藍郝三姓率千艘從閩安鎮入內
地焚掠南臺圍會城巡撫宜永貴命亮工守西南
門賊乘大雨薄城亮工手放大礮擊斃渠帥三人
賊解圍去城賴以全

姚啟聖 小倉山房文集 啟聖字熙之浙江會稽人
舉康熙二年鄉試宰廣東香山縣三藩反康親王
南征辟爲參謀以功授溫處僉事道擢福建布政
使尋命總督福建 福州濬湖事畧 康熙二十二年
總督姚啟聖巡撫金鉉議濬西湖不果

遲維城 道光福建通志 維城字汝長漢軍正白旗
人康熙三十五年知福州剛決善斷獄閩多淫祠
維城力禁之折毀百十餘所又請分派八府公捐
省獄囚米並給醫藥獄無痼斃以病卒官士民思

西湖志 卷十三 人物 十三
之與明知府唐珣並祀西湖書院

梅銷 雍正福建通志 銷號桐崖安徽宣城人康熙
六年進士四十年巡撫福建簡靜持大體凡海邦
名勝及先賢遺蹟悉加表揚 福州濬湖事畧 康熙
四十二年巡撫梅銷重濬西湖

李斯義 道光福建通志 斯義字質君山東長山人
康熙二十七年進士四十四年巡撫福建時方試
士貢院士額溢號舍斯義與布政使高緝睿議增
修至千餘楹葺共學書院拔髦士肄業其中檄州

縣各立義學教孤寒子弟創育嬰堂嚴溺女之禁
恩威遍八郡以積勞成疾卒官士民卽書院肖像
祀之福州濬湖事畧康熙四十二年總督金世榮
巡撫梅鋗重濬西湖至四十四年十一月工竣世
榮與巡撫李斯義將全案圖冊分飭府縣存檔備
考

喀爾吉善

道光福建通志

喀爾吉善號澹園滿洲

正黃旗人乾隆十二年由山東巡撫擢閩浙總督
端重靜鎮有大臣體時臺灣生番跳梁授機宜平

西湖志

卷十三

人物

十四

定之番人自是尤向化累加太子太保卒諡莊恪
祀賢良福州濬湖事畧乾隆十三年總督喀爾吉
善檄府縣查取水利舊案圖冊重濬西湖

潘思榘

道光福建通志

思榘字絜方江蘇陽湖人

乾隆十三年巡撫福建思榘爲治以民食水利爲
先務謂閩地食繁田少不必凶年俱勞經畫籌常
平積儲請撥台倉協濟是年秋漳泉臺三郡旱又
潮水壞民田思榘奏請截江浙漕米十五萬石運
閩得不饑乾隆福州府志開郡城南直瀆新港福

州西湖晉郡守嚴高鑿廣二十餘里建閘瀦水溉田數萬頃宋明以來湖日縮今所存者十之三思渠因旱集民夫給工價開挑湮塞重築堤一千三百餘丈繕閘二座葺湖心開化寺偏植桃柳於堤上爲利最鉅以勞卒官事聞賜諡敏惠祀賢良

吳至慎

道光福建通志至慎字林塘江蘇震澤人

乾隆元年舉人十三年知閩縣畚經堂詩集林塘官閩縣被議僑居會城嘗以荔支素蘭壽山石爲治南三妙有詩咏之林塘從祖漢槎先生戍寧古

西湖志

卷十三 人物

十五

塔著有秋笳集至慎自爲寫刻菰蘆閒話乾隆十三年潘敏惠濬治西湖檄至慎爲承修官

姚循義

道光福建通志循義字若庵江西浮梁人

乾隆十三年以拔貢生知侯官縣冠悔堂筆記潘敏惠重濬西湖循義躬任其役隆暑祁寒曾不少輟菰蘆閒話乾隆十三年總督喀爾吉善巡撫潘思渠重濬西湖札飭府縣查取濬湖舊案圖冊適循義爲承修官因撰西湖志六卷刊行

沈鍾

道光福建通志鍾字鹿坪江蘇武進人乾隆

元年以舉人知屏南縣冠悔堂筆記乾隆初潘敏
惠重濬西湖時姚循義知侯官縣編輯湖志適毗
陵沈鍾以坐事免官居會城循義以志屬之

李拔

香草齋文鈔

拔字清翹四川犍爲人乾隆十

六年進士初宰鍾祥以卓異遷濟陽同知尋擢守
福甯調福州福州地濱海民以魚鹽爲利不事蠶
桑拔作種棉養蠶二說以勸民乾隆福州府志補
二十五年拔守福州奉大府檄修西湖廟寺並造
二橋自爲之記

西湖志

卷十三

人物

十六

福康安

道光福建通志

康安字敬齋滿洲鑲黃旗

人乾隆五十三年總督福建先是台匪林爽文謀
逆官兵持數月不下朝命同叅贊海蘭察率師入
閩渡臺滅之奏凱歸時大兵之後繼以荒旱康安
檄閩候兩縣議疏會城河渠並濬城外西湖以興
水利福州濬湖事畧乾隆五十三年康安議濬西
北湖並內河後移命兩廣巡撫徐嗣曾卒濬之
徐嗣曾道光福建通志嗣曾字兩松江蘇丹徒人
乾隆二十八年進士五十年由福建布政使進巡

撫喜士如嗜欲當開藩時卽招知名士從容諷議
旣監臨秋闈取報罷卷精校得百餘人牒州縣敦
促來省送入鰲峰書院肄業於是人人自奮卒卽
祀書院福州濬湖事畧乾隆五十四年巡撫徐嗣
曾濬西湖

孫爾準

左海文集爾準字平叔世爲江蘇無錫人
後占籍金匱嘉慶十年進士道光五年授閩浙總
督以平臺功加太子太保十二年卒贈太子太師
謚文靖爾準好興水利福州西湖鑿於晉郡守嚴

西湖志

卷十三

人物

十七

高唐宋以來屢修治溉田萬餘畝國朝康熙後凡
四濬之每間四十餘年一舉頃湖墊隘公委員履
勘延鄉宦主土功周圍爲石隄使永鞏湖之北梅
柳橋始獲暢流而西北諸山之水有所鍾四野霑
渥東湖在郡城東北久湮宋蔡忠惠復五塘卽其
地也鄉民願自捐貲開之公令先濬鶴嘴橋土壩
口以醜水源三月竣事溝渠頗導達矣絳跗堂詩
集西湖自潘敏惠濬後迨福文襄重治計四十年
今又適符其歲孫公倡議復之殆有天也

陸我嵩

道光福建通志我嵩字萊臧江蘇青浦人

道光二年進士四年知壽甯縣八年權福州海防

同知左海文集我嵩六歲時夜讀置小几母紡甄

側一鎧熒熒漏三下未息見母紡苧手皸瘃血出

臥輒呻吟作痛未嘗不淚潛潛下也父卒益孤苦

弱冠舉於鄉比成進士授知縣奉母入閩始宰莆

田繼移閩縣在官勤慎務廣慈惠蓋不忘母訓云

續停雲閣詩話我嵩與河內曹瑾桐城姚瑩稱閩

中三循吏榕園詩鈔我嵩曾濬福州西湖以興水

利

陳銑

道光福建通志銑字麗修湖南祁陽人道光

八年任閩縣雲閒堂文集閩為省會首邑號稱難

治銑至官先痛扑縣役中之婪橫者數人民大稱

快善決疑獄秩滿去官一無長物所得惟民謠而

已菰蘆閒話林文忠重濬福州西北湖銑躬任其

役

湯金釗

通甫文錄金釗字敦甫浙江蕭山人嘉慶

四年進士由戶部左侍郎遷左都御史屢奉命察

吏各省週歷萬里及使閩還拜吏部尙書夷禍首發廣東沿海騷然一日上問公以廣事可付託者公以林則徐對坐是失旨而公自此退矣咸豐六年卒年八十五諡文端冠悔堂筆記道光己丑林文忠公丁憂在籍大府謀濬西北湖以公總其事公躬親督役日夕不遑於清復湖址尤爲認真而西北鄉民以公強正廉明不便於己遂構蜚語有忌公者據以上聞朝命湯文端來閩定讞按之一無影響而文忠聲譽轉起

王凱泰

春在堂文集凱泰字幼軒號補帆江蘇寶

應人道光三十年進士同治九年巡撫福建多善政尤以教士爲首務其在粵也於越秀山之麓建應元書院逾年順德梁耀樞魁天下卽院中肄業士也至閩又仿廣州學海堂例創設致用堂於西湖書院課諸生以經學光緒元年渡臺還至省卒年五十有三贈太子少保諡文勤八分室筆記同治十二年凱泰籌鹽釐餘款修治西湖